

11 NOIEMBRIE
RUGACIUNEA
SF. CUVIOS
MAXIM DE LA MOSCOVA

МОЛИТВА

Угодниче Божий, молитвенниче наш теплый и скорый помощниче, блаженне Максиме! Припадая к иконе твоей, прославляем многотрудные подвиги юродства твоего. Христа ради возлюбив бо Единого Бога от всея души твоей, ты мирскими красотами не восхотел еси наслаждаться; роднаго жилища, любве сродник, богатства и славы временныя отреклся еси и неприютное житие возлюбил еси. Прилежав о спасении души, плоть твою наготою телесною, мразом и зноем, постом и бдением, долговременным на земли лежанием изнурил еси и вся страсти ея духови покорил еси, на земли пожив небесно, во плоти духовно. Умом весь ко премирным возьмься, плотскую мудрость отринул еси, и быв мудр о Христе, юрод мирови показался еси, от неразумных многия обиды и биения благодушно претерпевая и многих нечестивых на путь спасения наставляя. Темже,

по скончании твоих подвигов, Всеправедный Судия нетлением честных твоих мощей и многими чудесы ты прослави, душу же твою святую в небесныя обители всели, идеже, предстоя престолу неприступнаго Божественнаго света, в нем, яко в зеркале, видиши наша нужды, слышиши наша к тебе прошения, и, яко друг Христов, имаши велие к Нему дерзновение молитися о нас. Сего ради усердно просим тя: помолися Господу Богу о нас к земли приверженных, да и мы, в подражание твоему ангелоподобному на земли житию, не погрязнем в суетных житейских попечениях и в земных наслаждениях; не прельщаемся и не прилепляемся всею душею к тленным мира сего благам, но да обратит Господь Своею благодатию наша мысли и желания к небесным, и укрепит желати восприятия будущих нетленных сокровищ. Да подаст нам слабым силу к побеждению страстей, мыслей и желаний греховных. Да пленит наш кичливый ум в послушание веры, избавит от высокоумия, суемудрия, ложных пагубных учений и дарует нам мудрость духовную. Да растворит окамененная сердца наша слезами умиления и сокрушения о наших согрешениях, согреет их любовью к Нему, нашему Создателю, и к ближним нашим. Испроси всем, во всякой нужде сущим и к твоему заступлению

прибегающим, всякий дар коемуждо
благопотребен: больным исцеление, печальным
утешение, бедствующим помощь, обиженным
защиту. Принеси ко Господу святую молитву о
всех нас многогрешных, яко да не по грехом
нашим воздаст нам, ниже по беззакониям
нашим накажет нас, но отвратит всякий гнев,
праведно движимый на ны, и пробавит милость
Свою, всяких нужд, бед, напастей, скорбей и
болезней нас избавляя. И имиже вестъ судьбами
да наставит нас на путь спасения, подаст
прочее время живота нашего в покаянии и
благочестии преити, и христианскую кончину
неболезненну, непостыдну, мирну и Небеснаго
Царствия наследие получите со всеми святыми
во веки веков. Аминь.